



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

**Brazil Tir Lula-i tatembang
election nübuyim tenzüokogo**

**Douglass-i anogo ka nung 50m
freestyle world record anaben yanglu**

VOL. XXIII ISSUE NO. 305 (ADOK 305) DIMAPUR TENTONÜ (MONDAY) LUROI (AUGUST) 17, 2026

₹ 5.00

I-Day 2026 nung sempet balala agütsüogo

Dimapur, August 16, 2026 (TYO): August 15, 2026 nü Nagaland Civil Secretariat Plaza, Kohima nung 80 buba Independence Day 2026 amungdang awards aser medals agüja liasü.

Videlalie Zashumo, Inspector General of Police nem President's Police Medal for 2026 for Distinguished Service aser Limasunep Jamir, Inspector General of Police nem Inspector General of Police agütsü.

2026 atema Governor's Gold Medal angurtem: Masudong, NPS, AIGP (Admin), PHQ; Livitoli Sukhalu, NCS, Deputy Secretary, P&AR; aser Kezhaseluo-o Pienyü, Wrestler (Naga Traditional Wrestling).

Republic Day 2025 nung sangdongba Medal for Meritorious Service agütsürtem: Shouka Kakheto, NPS, Deputy Commandant; Zasilie Angami, Sub-Inspector; aser Metseirovi Sakhrie, Naik.

Maneni, Independence Day 2025 nung medals sangdongba Kevithuto Sophie, IPS, IGP, aser Aboli Metha, NPS, Commandant na nem agüja liasü.

Republic Day 2026 nung Governor's Gold Medal agütsütsü sangdongba ama Chubasangla Longkumer, NSS, Joint Secretary, Home Department; Er. K. Tingtenmoie Konyak, Executive Engineer, Electrical Division, Mon; Dr. Michael Imti Imchen, Deputy Director, Veterinary Hospital, Dimapur; Dr. Wobenthung M. Kithan, Medical Officer, Chukitong PHC, Wokha; E. Aphak Konyak, UBI, DEF Mon; aser Abemo Ezung, ABSI, Narcotic Branch, PHQ nunger nem agütsü.

Governor's Commendation Certificates for 2026 angurtem: Er. Wapangnaro Imchen,

Executive Engineer, Office of the Chief Engineer, Water Resources Department; Vikato Thonger, ADC to Governor of Nagaland; Kevingoto Kulnu, Revenue Officer, Kohima; Abeinuo Jasmine Ashao, NCS, Under Secretary, Finance Department; Imtinungla Longkumer, EAC, Satakha; T. Henthai Phom, Assistant Commandant, 7th NAP Battalion, Bhandari; H. Pongloi, NPS, SDPO, Tizit; I. Yongkongtoshi Chang, UBSI, Police Station Tuensang; Lovitoli Zhimomi, Vice Principal, Mount Olive College, Kohima; Y. Mhonlumi Ezung, Caretaker, Nagaland House, Guwahati; Padampukhuri VC Fair Price Shop, (Padumpukhuri Village Council); aser Nagaland House, New Delhi staff.

Iba sentong nung Chief Minister Dr. Neiphiu Rio-i linük wako atsüket, Rashtriya Salute agizük aser parade repranga senzü.

Taküm Parade Commander Akihito X. Chishi, NPS, Deputy Commandant, 1st NAP aser Alovika Swu, NPS, Assistant Commandant, 12th NAP, Second-in-Command nati anir March Past agia liasü.

March Past parade nung 13 Assam Rifles Battalion, 78 Battalion CRPF, 105 Battalion BSF, Arunachal Pradesh Police (IR), DEF Kohima, 4thNAP Battalion, 10th NAP (IR) Battalion, 15th NAP (IR) Mahila Battalion, Home Guards, Civil Defence & SDRF aser Ex-Servicemen-i shilem agi.

Maneni, Nagaland Police Central Brass Band, PTS, 4th NAP Battalion nungi Nagaland Police Auxiliary Brass Band den 13 Assam Rifles Pipe Band aser 15th NAP (IR) Mahila Pipe Band temia parade nung shilem agia liasü.

Member of Parliament tem dang pelaba metetdaksüogo aser AIIMS Guwahati renloksü aser Northeast nung healthcare infrastructure tashi itdaksütsü atema tajungtiba agüja inyaktsü nangzüokogo.

Nagaland nungi Lok Sabha Member ka ama pai Northeast dak sendakba tebilemsütem asoshi ola adoktsü aser national healthcare institutions tali renloka aotsü atema inyaktsü ta Supongmeren-i ashi.

Lok Sabha Secretariat-i August 10, 2026 nü Ministry of Health & Family Welfare, Government of India nem S Supongmeren Jamir shimba osang metetdaksüogo.

Assam-Nagaland arrtsülen kibong 59 aienshidaktsür



August 10, 2025 nü Assam-Nagaland arrtsü anasa Negheribil, Merapani nung eviction operation ka agidang tangokba noksa angur. (file)

Dimapur, August 16, 2026 (TYO): Assam-Nagaland arrtsü anasa No. 2 Negheribil nung Assam sorkari kibong 59 aienshidaktsütsü sentong renemer.

Supreme Court-i tetuyuba ka agütsüba sülen Golaghat district administration aser Forest Department-i iba mapa inyaktsü lenmang lapoktsüogo.

Deobarnü ketdangsürtemi iba tesem semdangogo aser kibongtem dang August 18 tashi nung toktsür aotsü final notice agütsüogo.

Ketdangsürtemi ki nung number enokja lir aser drone cameras amshia detailed survey agiogo. Mapang talangka okadak atsütepa aruba sülen iba mapa inyaktsü mapang ka bentsür aruogo. Forest Department-i tesüiba nung No. 2 Negheribil nungi kibong 205 aienshidakja liasü saka tanünga kibong 59-i Gauhati High Court dangi oa stay

order angu aser iba sülen Supreme Court atong.

Kibongtemi anogo züngzüksüba tsüngda toktsür moura Golaghat administration-i eviction drive tenzüksü ta ketdangsürtemi ashi.

Assam aser Nagaland sorkartemi küm aika mebenteti aruba arrtsü ken o tiluba kuma meyoktsü merangba mapang ka iba mapa ya inyaktsü.

Nagaland Deputy Chief Minister & Home and Border Affairs Minister in charge Y. Patton-i July 29 nü Guwahati nung Assam Chief Minister Himanta Biswa Sarma den ajurutepa senden ka menogo aser idangji tenati inter-state tesentaktep, amalitep aser arrtsülen oil and gas exploration indang jembia liasü.

1972 Interim Agreement dena agreements balala akhümsübuu arrtsü onüktem ya state ana tsüngda olemtep, külem mapa

aser amalitep ajanga bentettsüla ta Y Patton-i shia liasü.

Nagaland-i arrtsülen ozüng alema ali atsünga agiba anema inyakba pusemer saka iba ya state anaprong nungi ketdangsürtemi amalitepa inyaktsüla ta shiogo.

Golaghat kübok No. 2 Negheribil nung eviction atema ozüangi melaogo saka Assam o Nagaland sorkartemi iba mapa koma inyaker ta asüba nung temulung agütsür.

Taküm May ita Special Chief Secretary M.K. Yadava-i No. 2 Negheribil semdanga tensa asadangogo. Iba mapang Forest Department, district administration, Central Reserve Police Force (CRPF) aser local police ketdangsürtemi dena liasü.

Iba assessment nung shilem ka ama drone surveillance ajanga tesem asadanga reprangogo aser tesüiba eviction drive sülen kiojen tasentem yangluba jangjashia liasü.

NSCN-YA-i Assam Rifles post amakba tenüing agir

Imphal, August 16, 2026 (Agencies): Arunachal Pradesh nung 21 Assam Rifles post ka amakba atema NSCN/GPRN Yung Aung (NSCN-YA)-i tenüing agiogo.

Changlang district kübok August 14 anepdang Longvi anasa Tikhak Taipi village nung AR post amak.

Naga Army-i anepdang 3:00 ako meta amaktsü tenzük aser minute 45 shi khatep ta Ministry

of Information and Publicity-i sangdong ka nung ashi.

Naga nunger madak tashiyim agi amokbanger aliba anema iba mapa inyak. Naga lima ya shinga kübok mayutsü takhangba agütsüshir ta NSCN-YA-isa ashi.

Onok yimtenren aser litsü nükjiongtem matong tashi Indian security forces anema maneni inyaktsü ta parnokisa ashi.

Onoki amakdang security

forces-i mapang shitak nung sepai talila yok aser drones amshi aser iba jagi ozü unit-i tesem toktsür ao ta NSCN-YA-isa metetdaksü.

Iba tatalokba nung sepaitem khasetogo ta NSCN-YA-i ashir saka kwi ka asü mejangiatet lir.

August 14 anepdang Assam Rifles post amak saka Assam Rifles personnel shinga taküm melalu ta security ketdangsürtemibo ashir.

Manipur nung 'No NRC, No Census' takhangba agütsür

Imphal, August 16, 2026 (Agencies): Campaign for Justice and Fair Delimitation (JFD) nungi kaketshirtem kongsang ajanga August 16, 2026 nü Directorate of Census Operations Manipur nung lungkak aitogo.

Manipur nung National Register of Citizens (NRC) update masü tashi Census maparen meinyaki atatsüla ta parnoki takhangba agüja lungkak ait.

Lungkak aitertermi Directorate kima adenshi aser

Hombar nungi Census exercise tenzüksü aliba anema "No NRC, No Census" yimym ayima noktak.

NRC update asüba maparen metembang tashi Census mapa thinena atatsü atema onoki lungkak aitba sentong balala agia aruogo. Onoki shidi aiben zülüaka aser lungkak aita takhangba agütsüba magizüker ta lungkak aitertermi ashi.

Tanü lungkak aitertermi office shibangtsütsü merangdang tensa mejungi aküm aser security

forces-i parnok senshidaktsütsü atema tear gas amshi. Police-i lungkak aitertermi senshidaktsütsü merangdang kaketshir asem yiru.

Ketdangsürtemi Census mapa thinena yur NRC update mapa meinyak tashi onoki lungkak aitsü ta Campaign for Justice and Fair Delimitation (JFD)-i metetdaksüogo.

Manipur nung ozüng alema arur aika lir aser parnok maitsü mezüng mejangiatep ser Census agira population data nung timtem ajurutsü ta parnoki ashi.

MP Supongmeren AIIMS Guwahati züngsem akümer

Dimapur, August 16, 2026 (TYO): All India Institute of Medical Sciences (AIIMS), Guwahati nung Lok Sabha MP S. Supongmeren Jamir-i Member of the Lok Sabha inyaktsü shimogo.

Member of Lok Sabha to AIIMS, Guwahati atema mezüng nung nominations ana liasü saka candidate kati tenüing meyipa agiba ajanga All India Institute of Medical Sciences Act, 1956 telatetbatem kübok S. Supongmeren Jamir shimogo ta Lok Sabha Bulletin ajanga metetdaksü.

Pradyut Bordoloi-i Lok Sabha nungi sodi agiba ajanga iba menden tazüng aküm.

Supongmeren Jamir-i

Arts, Music aser Literature nung Governor's Award agütsüogo



Nand Kishore Yadav aser Dr. Neiphiu Rio den sempet angurtem aser ketdangsürtem Dr Imkongliba Ao Hall, Lok Bhavan, Kohima nung Honibarnü tangokba noksa ka yangi angur.

Dimapur, Luroi/August 16 (TYO): Arts, Music aser Literature nung alakteta inyaktetba atema 80 buba Independence Day den jülemi Honibarnü Dr Imkongliba Ao Hall, Lok Bhavan, Kohima nung sentong ka agia kija aser telok pongu nem Governor's Award 2026 agütsüogo.

Aku Zeliang aser Bendang Walling na nem Arts sempet agütsü, Divine Connection, Imkonglemba aser Joye Woch nunger nem Music indang sempet agüja liasü.

Nagaland Angh Nand Kishore Yadav-i iba sentong nung jembidang sempet angur nem tenüsang agütsü aser parnoki takok ngutetba ajanga küm aika parnoki bendanga agütsür yimya tasen amshia temulungtetba tulu nung inyakba temaitsü sayur, ta ashi.

Governor's Award ya Arts, Music aser Literature wadang nung alakteta shilem tajung agiba jangjateta tushitsü aser

state indang sobaliba senmang maneni tejakleni bener aotsü aser wazüka ayutsü asoshi ajaki bendanga agütsür inyaktetba züngzüktepba temaitsü lir ta pai ashi.

Arts, music aser literature ajanga nüburtemi tesüiba bilemteter, tang tensa angateter aser tarutsü asoshi bilemdangteter, ta ashi.

Pai Nagaland nung puti otsü aser sobaliba shisatsü tem akhi mapang nungi jembishinü, sobaliba ken, lisopur shisatsü, yimsü-yimbong, teka mapa aser otsü ashiba ajanga belena aruba indang jangratemba lemsatepa liasü.

Pai sempet angurtem dang 'indigenous musical traditions' wazüka ayutsü aser tera mesamai tanü tensa tia den apet yanglua amshitsü ayongzüka liasü.

Angh-i kaket reju, cultural organizations, artistes, writers, musicians aser lokti tentet balala tsüngta tali lungjemmer lanur nem

maongka tali agütsütsü ayongzüik.

Pai digital technology tali amshitsü ayongzüik aser item hadir ajanga India aser alima matsüngdag Nagaland dak aketba sempet tem sayutsü ajungmeso.

Yadav-i lisopur oshi aser shisatsü wazüka yutsü tongtipang lir ta ashi aser oshi ka samabaji nisung meimchir sobaliba nung shilem ka samaba den sako lir ta ashi.

Iba sentong nung Commissioner and Secretary, Art and Culture, Bodeno S. Colo-i 2003 küm Governor's Award tenzüka indang otsü aser nükjidong tongmelang agi lemsatepa liasü.

Iba sempet angur shia nem citation, plaque, shawl aser sen 5 lakh agüja liasü.

Sentong nung Chief Minister, Dr. Neiphiu Rio; Advisors; MLAs; sorkar ketdangsür, awardees aser tejaoker tem dena liasü.

Congress Committee-i longkak ait

Dimapur, Luroi/August 16 (TYO): Haldwani nung Congress rally ka nung Congress tir Mallikarjun Kharge adenba sülen iba tesem nung "purification" yimya amshiba atema aija Dimapur District Congress Committee (DCC) aser party workers temi Hokulbarnü Congress Bhavan, Dimapur nung yimjung nung longkak aita liasü.

Iba ama inyaktetba tangatetba aliba asoshi longkak aiter temi khukhua aitsü, koba Constitution of India nung shia aliba 'equality, dignity aser fraternity' anema lir ta ashi.

Ibai nisung meimchir nem akhum magütsüba aser constitution mezüngshiba mapa lir ta AICC-ia ashi.

Iba sentong nung jembidang, 'untouchability', kin telesa aser tesempatep yimyatem democratic aser constitutional India nung alitsü tesem maka, ta DCC Dimapur ketdangsür temi ashi. Longkak aiter temi "No to Untouchability, Yes to Equality," "Human Dignity Is Not Negotiable," aser "One Constitution, One Equality, One India" amala ojang tem zülua bener nokdaka liasü.

Longkak aitba ya tamangba yimsü mesüra kin kar anema masü, saka nisung meimchir mezüngmeshia, bensaa amshiba anema lir, ta ashi.

India indang tashi ya kin balala, ajak sako aser constitutional fraternity nung keta lir aser item yimya tem senso ajungai kumzüka ayutsüla, ta ashi.

DCC Dimapur-i Congress tir Mallikarjun Kharge den tejashi lemsateper aser India nunger senso ajunga indang akum aser sako amshiba wazüka ayutsü temulungtetba akangshir, ta parnoki ashi.

Nagaland Angh-i asür Vajpayee aser asür La. Ganesan bilemtet



Dimapur, Luroi/August 16 (TYO): Nagaland Angh Nand Kishore Yadav den Governor's Secretariat, Lok Bhavan, Kohima nung inyaker ketdangsür aser staff temi August 16, 2026 nü taoba ato kilonser Atal Bihari Vajpayee sür küm ti ajungba anogomung aser taoba Nagaland angh La. Ganesan sür küm ka ajungba anogo nung akhum agüja liasü.

Lenir ana yagi nübur aser linük tenzüka bilemteta Angh den ketdangsür aser staff temi

tetushi agüja liasü.

Parnoki bendanga agütsür nübur tenzüka aser mapa tajung jenti inyaka yutsüba iba anogo bilemteta liasü.

Taoba ato kilonser Atal Bihari Vajpayee ya India nung o jembir takotet rongnung ka ta züngshir. Pai nükla tulu yur linük aniba, nüburtem atsür arutsüsa o jembitetba aser democratic values asoshi manokshi nokdakba atema linüki kodanga mamadoker. Pai India terenlok, linük telungjem aser alima

ajungai metettsüsa litetba ajanga tanü tashi nüburtem ajungmesor.

Parnoki Nagaland indang angh 21 buba, La. Ganesan nema akhum tetushi agüja liasü. Asür La. Ganesan ya tongmelang, ajemalur aser linük aser Nagaland nung nübur tenzüka nung bendanga agüja liasü. Pa dak telemla yimya, nübur meimba aser bendanga agütsür nübur tenzüka ajanga pa angh ama inyakdang nüburtem mulungjang nung kongshia liasü.

Nagaland tesem balala nung 80th Independence Day mungogo

Dimapur, Luroi/August 16 (TYO): Linük ajunga den külemi Nagaland nunga tesem balala nung August 15, 2026 nü 80 buba Independence Day munga liasü.

MOKOKCHUNG: Mokokchung nung iba anogomung ya Imkongmeren Sports Complex nung amung, kong sentong akhumdong ka ama Minister, Rural Development and State Institute of Rural Development (SIRD), Government of Nagaland, Metsubo Jamir-i sentong moatsü.

Pa tonga aruba sülen linük ken aten aser Minister-i National Flag salar parade contingents nungi Rashtriya salute agia liasü aser iba sülen National Anthem aten. Minister Metsubo-isa Independence Day o jembia liasü.

Iba anogomung temaitsü Minister-i nisung toku nem District Commendation Awards agüja liasü.

March past tanishir Zareni Yanthan, NPS (Asstt. Commandant, 2nd NAP Bn. Alichen) liasü aser second-in-command ABI Tekatemjen SM (RHQ Mokokchung) liasü aser Band Party ya 12th Assam Rifles nungi liasü.

March past nung DEF Mokokchung, 2nd NAP Bn. Alichen, Home Guards, Mokokchung, Ex-Servicemen, NCC, Fazl Ali College, NCC, PM Shri MGHSS, Scouts & Guides, QMHSS, Jubilee Memorial School, Scouts & Guides, Sumi GHS, Scouts & Guides N.I. Jamir GHSS aser Mokokchung District BS&G nungi shilem agia liasü.

Iba sentong tembangba sülen sentong akhumdong-i exhibition stalls tem semzüksü, koba sorkar indang department balalai lapoka liasü.

Iba sentong nung Mangmetong Cultural Club, Gorkha Union Mokokchung aser Longtrok Senden Ungma ajanga sobaliba saya aser tsüingsang agi shilem agia liasü.

Nikongdang DC XI aser SP XI tsüngta football exhibition match asaya aser penalty shootout ayongzüka liasü.

DIMAPUR: Dimapur district nung 80 buba Independence Day ya District Sports Stadium (DDSC Stadium) nung Minister, Women Resource Development and Horticulture, Government of Nagaland, Salhoutuonuo Kruse tongti tesemdang sür munga liasü.

Tongti tesemdangeri linük nisan atsüketa sentong tenzüik aser Rashtriya Salute agi aser iba sülen parade semdang aser Independence Day o jembia liasü.

Parade contingents ya Parade Commander, BHM, Havildar Khekato Sema-i anir liasü. Parade nung Police Commissionerate, Dimapur; Home Guard, Civil Defence and SDRF; Ex-servicemen; NCC Dimapur Government College; NCC Greenwood Higher Secondary School, Dimapur; Scouts and Guides of Holy Cross Higher Secondary School, Dimapur; MGM Higher Secondary School, Dimapur; aser 15th Assam Rifles Band Platoon nungi shilem agia liasü.

Iba sentong nung nisung ter nem District Award agütsü aser

parnokji K. Akahoto Yeptho, Head Constable, Excise, Dimapur; Mapusenla Jamir, Assistant Horticulture Officer, Dimapur; Guipeule Nsarangbe, LDA-cum-Computer Assistant, District Election Office, Dimapur; Er. Nagaho Sema, Sub-Divisional Officer, PHED, Urban Division, Dimapur; Takosangba Ao, Animal Attendant, Veterinary Hospital, Dimapur; Rosal Yanthan, Unarmed Branch Constable, East Police Station, Dimapur; C. Merenba Ao, C/Operator, Establishment Branch, East Police Station, Dimapur; Nirendra Mushahary, Accounts & Programme Assistant, My Bharat Kendra, Dimapur; District Child Protection Officer, District Child Protection Unit, Dimapur tenüing nung Avika Zhimomi; aser Bipen Lotha, LDA, East Dimapur Town Council alitsü.

Iba sentongb nung PM Shri GHSS, Burma Camp, aser Pranab Vidyapith Higher Secondary School nungi tsüingsang balala agi shilem agi aser Dimasa Kachari Cultural Troupe, Bamunphukhuri, Dimapur, aser Tsunrun Yimkhung Cultural Club, Dimapur nungia sobaliba tsüingsang agi shilem agia liasü.

Kasa mapang sorkar departments aser agencies balalai lapoka aliba exhibition stalls tem Minister Kruse-i semzüksü, kong Department of Agriculture, Department of Horticulture, District Rural Development Agency, Department of Industries and Commerce, Nagaland Handloom and Handicrafts Development Corporation, Department of Health and Family Welfare, Department of Cooperation, Khadi and Village Industries Commission, Directorate of Information and Publicity, aser Dimapur Police ajanga stall lapok.

CHUMOUKEDIMA: District Administration, Chümoukedima ajanga 80 buba Independence Day sentong Sammagooting Stadium, DC's Office Complex, Chümoukedima nung ayongzüka liasü.

Sentong akhumdong ama Minister, Environment, Forest & Climate Change and Village Guards, C. L. John aden aser National Song atenba sülen pai National Flag atsüketa Rashtriya Salute agi aser National Anthem aten. Iba sülen Minister C.L John-i parade semdangba sülen Independence Day o jembia liasü.

Iba sentong nung Kevineinuio Rio, District Programme Officer, Social Welfare Department, Chümoukedima; Hotolu G. Sumi, Junior Engineer, Public Health Engineering Department, Rural Division aser Weprepeu Losou, Computer Operator, DCP Office, Chümoukedima nunger nem District Commendation Awards agüja liasü.

Iba anogomung Parade Commander, DYSP Virielhouillie Miario-i anir march past nung 1st NAP Platoon, 22nd Assam Rifles, Ex-Servicemen, Patkai Army Wing, Patkai Air Wing, Government Higher Secondary School, Chumoukedima, Mount Mary College, St. Joseph University aser Pipe Band, 22nd Assam Rifles nungi shilem agia liasü.

Amit Shah-i Atal Bihari Vajpayee indang kürakyanglu sayatsü



August 16, 2026 nü Rajasthan kübok Chittorgarh nung taoba mapang Ato kilonser, Atal Bihari Vajpayee indang kürakyanglu ka sayatsüba sülen Union Home Minister Amit Shah, Rajasthan Chief Minister Bhajan Lal Sharma, MP CP Joshi aser Nimbahera MLA Shrichand Kriplani nunger tangokba noksa nung angur.

New Delhi, Luroi/August 16 (Agencies): Amongnü Union Home Minister Amit Shah-i, taoba mapang Ato kilonser Atal Bihari Vajpayee mapang talangka Opposition nung aliba sülen ang Ato kilonser aküm, ajisüaka pai kodanga pa tangatetba nungi matsüngshi, ta metetdaksü.

Ibayongji Vajpayee dang "Ajatshatru" (tsükchir maliba nisung) ta aja, ta paisa ashi.

Amongnü Rajasthan kübok Chittorgarh district nung Atal Bihari Vajpayee indang kürakyanglu ka sayatsüba den

külemi Vajpayee asüba anogomong nung terenlok project aika tenzüksüba sülen lokti den jembidang Sha-i, Vajpayee-i teti linük tama südaksü aser telemtetba tajung aika agia liasü, ta metetdaksü.

Atal Bihari Vajpayee indang kürakyangluji süklep 21 talang lir. Iba kürakyanglu ya sen crore 1.5 dak tali indoka yanglu.

Paisa district 15 nung sen crore 5,755 jenjang terenlok project 944 tenzüksü.

Union Home Minister-isa, Vajpayee mapang nung Ministry of Tribal Affairs tenzüka liasü

aser tribal temeden kümzüksü atema pai telemtetba tajung aika agia inyak, ta ashi.

Nikongdang Alwar nunga Shah-i terenlok project aika tenzüka liasü.

Amit Shah-i, Rajasthan nung tongti opposition lenirtem telung nung mangatettep lir, ajisüaka nüburttem temoatsü ajanga asen lenirtemibo akhümtsübu angur, ta ashi.

Paisa, Ato kilonser Narendra Modi aser Chief Minister Bhajan Lal Sharma na lenisüba nung Rajasthan nung ano terenlok kanga alitsü, ta shisem.

Taoba mapang Bengal Dy. Speaker Asish Banerjee soseta asü

Kolkata, August 16 (Agencies): Taoba mapang West Bengal assembly nung deputy speaker, Asish Banerjee Amongnü anepdang soseta sür lia angu.

Birbhum district kübok Rampurhat nung Trinamool Congress office nung pa lisü agi alenseta sür lia anguba sülen tasümanngi post-mortem atema bener ao. Tang tashi nungbo pa kechi kuli ajanga soseta asüar memetet, ta police-i ashi.

Osang angazükba agi, par ki anasa aliba party office nung pa soseta asüba tesem nungji pai züluba shidi-a ka nguogo.

Ashish Banerjee ya TMC tongti Mamata Banerjee chief minister asüba mapang nung deputy speaker liasü. Pa ya Rampurhat menden nungi ponguben tashi MLA liasü.

Taküm küm tetenzüklen Ashish Banerjee-i TMC Birbhum district core committee chairman menden nungi anena liasü.

Iba mapang nungji pai, "Ni maneni party general member ka asütsü," ta metetdakja liasü.

Banerjee-isa, pa taoba mapang Lavpur MLA Abhijit Sinha den mangatettep kecha maliasü, ta ashi. Sinha-a Birbhum district core committee nungi anenogo.

Taoba Bengal state assembly elections nung Ashish Banerjee aser Abhijit Sinha napronglai tamakok ngua liasü.

BJP-i Birbhum kübok assembly constituencies 11 nungi 6 nung takok angu aser tanüngba menden pongu nungji TMC-i takok angu.

2021 küm assembly election

nungbo TMC-i Birbhum nung menden 10 nungi takok angu aser BJP-i menden ka nung dang takok ngua liasü.

Asish Banerjee ya TMC nung lenir tain ka liasü aser 2001 küm nungi 2026 küm tashi pa Rampurhat nungi MLA liasü.

Mamata-i aniba sorkar nung pa deputy speaker inyakba den külemi school education minister aser agriculture minister-a inyakogo.

2026 assembly election nung pai Rampurhat menden nung TMC ticket nung toktep saka BJP candidate Dhruva Saha matsüngdang tamakok ngua liasü.

Iba election nung tamakok anguba sülenbo pai yimtenren nung kangabo shilem magii liasü, ta TMC osang ka ajanga metetdaksü.



August 16, 2026 nü Ranchi nung JPSC-JSSC-CGL paper leak asüba ken o dak sendakba nung kaketshirtemi lumia longkak aitiba noksa nung angur.

LS nung paper leaks dak sendakba tasüngdangbatem memela: CJP

New Delhi, August 16 (Agencies): Amongnü Cockroach Janta Party (CJP) otongdar, Saurav Das-i, Lok Sabha senden nung NEET, paper leaks aser kaketshirtemi longkak aitiba dak sendakba nung tasüngdangbatem benoktsü atema memela, ta metetdaksü.

Saurav Das-i X ajanga, DMK nungi Lok Sabha MP Matheswaran V S-i tasüngdangba asem atema Union Home Ministry aser Union Education Ministry dang nungi telangzüba meshia liasü, ta metetdaksü.

Tasüngdangbatemji NEET-UG 2026 indang application fees meyipa agütsütsü, nüburttemi sorkar dak tamang mekateki akümba, Jantar Mantar nung longkak aiterem nem tzi aser metsümeshidak magütsüba, paper leaks, shisaliok nung temelenshi aser longkak aittsü temeden dak sendakba tasüngdangbatem liasü, ta Das-i metetdaksü.

Das-i, Rule 41(2), clauses (i), (iv), (v), (xviii) aser (xxii) nung ajemdaker tasüngdangbatem memela, ta metetdaksü.

"Item ama tasüngdangbatem Parliament nung masüngdangtetra sorkari kechi kuli agütsütsü? Longkak aitiba agi asü? Kanga tongtibang hoptatem nung kechiba Home

Minister Amit Shah Parliament-i arua telangzüba magütsü?," ta Das-i asüngdang.

"MP ka atema tasüngdangbatem benoktsüji inyakyim ka dang masü saka iba ya parliamentary democracy nung tongtibang. Question Hour ya tashi tulu aliba minister temi nüburttemi shimtetba lenirtem nem telangzüba agütsütsü atema lir. Yamaji mesüra nüburttemi lenmang nung longkak aittsüsa akümtsü," ta pai ashi.

NEET-UG examination nung ochimashi aser paper leaks nung ajemdaker CJP leniba nung kaketshirtemi Jantar Mantar nung longkak ait tenzüka liasü.

Iba dak alia activist Sonam Wangchuk-ia anogo aika lumia longkak ait. July 20 nü kaketshirtemi 'Sansad Chalo' march agiba mapang nung police-i longkak aiterem dak ajok agi azükba den külemi tear gas aser rubber injang khalokja liasü.

Tesülen sorkari Education Minister Dharmendra Pradhan menden nungi anentsüba sülen CJP-i longkak aitiba anena liasü.

Parliament nunga Opposition party temi police-i kaketshirtem dak tashiyim amshiba atema Amit Shah dang telangzüba agüjang ta takhangba agüja liasü.



New Delhi, August 16, 2026: Taoba mapang Ato kilonser, Atal Bihari Vajpayee asüba anogomong nung Ato kilonser, Narendra Modi-i asür nem akhüm agütsüba noksa nung angur.

Bangladesh PM Tarique Rahman-i India semdangtsü

New Delhi, August 16 (Agencies): Taruba hopta tatembanglen Bangladesh Ato kilonser Tarique Rahman-i India semdangtsü atema linük anaprong nungi ketdangsertemi tongtepratepa jembidar, ta osang ka ajanga metetdaksü.

Rahman-i August 21 nungi August 25 tsüngda India semdangtsüa akok. Pa Ato kilonser akümba sülen tang mezüng pai India semdangtsü.

India semdangtsü atema Ato kilonser Narendra Modi-i Rahman jaok.

Rahman-i India semdangba ajanga linük ana tesendaktep yanglushitsü atema maangka angutsü, kechiyong linük ana tsüngda onük aika nung mangatettep adoka lir.

Bangladesh-i India dang taoba mapang Bangladesh Ato kilonser Sheikh Hasina par linüki anir aotsü atema mepishir,

anungji Rahman-i India semdangba mapang nung iba atemajia jembitsüa akok, ta osang angazüker.

Iba dak alia linük anati arrtsü ketdangsuba, yimtenren, shishilembaba, visa aser tzi lemsatepba onüktem nunga o lemteptsüa akok.

Ano külen India-i Bangladesh nung security, telungpurtem inyaksangshi, Bangladesh nung Hindu nunger densema nütsüng ajema alirtem kümzüka alitsü aser defence atema jembitsüa akok.

Ministry of external affairs otongdar, Randhir Jaiswal-i, "Onoki linük semdangtsü atema Bangladesh Ato kilonser jaokogo. Onoki BRICS summit mapang outreach session nung adentsü atema-a Bangladesh Ato kilonser jaokogo. Iba dak sendakba nung onoki maneni osang metetdaksütsü," ta ashi.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 17, 2026

Oh, ni kü tasoli amadokra !

Asenok anema alidang asenok shirangba mapangtem amadoker. Kasaji asenok kaa iita jangratema alidang timtema sensaka aliba mapangtem amadoker. Aji alima nung nisunger yimya, anungji ajia kecha masü. Ajisüaka, kodaser asenok pei tetsü tasoli Naga yimten temeten atema inyakang, India nung sepaitem ket nung asenok timtem reshikangshi aser maksü ajuruba asenoki amadoktsü ? Kodaser, Naga yimten nüchiso atema ola adokba agi asen yim ajunga rongdoktsüba aser asenok yim ana asem anidena yim ka nung pudena yur kangshiba anogotem amadoktsü ? Kodaser, Naga yimten nüchiso asoshi rarar nokinketerem yimti yimdong aser arem nung shiruru ama kaa arishiba anogotem amadoktsü ? Kodaser, Naga yimten nüchiso asoshi rarar temeyong aser temesüla temezüng nung ajem janger kangshiba, langkoshishi sendaka yur mersü rong menemdoktsüba, asükwa amang tepiyong tzu temekong nung tamang ajunga metena yutsüba, electric agi pua kangshiba aser tarensena nokdakdoksür khaseta endokba anogotem amadoktsü ? Atangji, tanübo asenoki timtem reshikangshi marem India telungjem kübok state ka kümer yangji India temzüng kübok teyari agia jangratema lidagi. Aji oda, yakanü ama, India nüchiso anogo angubamung nunga Nagaland government nung yimsüsürtemi anir India wako atsüketa salem agütsür aser India kin naklo ken tena pelatepa amunger. Joko asenoki timtem marem agizükadokerji ajia kecha masü. Ajisüaka, Nagaland government nung yimsüsür aser ketdangser tulur akümba agi kodaser Naga yimten nüchiso mechi asenok tsüraburtem taküm tenla agütsüba aser reshikangshi timtem ajuruba anogotem amadoktsü ? Ajibo, ita sen crore junga achitsüsa mapa anguyonga amadokla masü ! Alima nung gari tajungtiba nung mener sepaitemi meiner jajatsüsa government nung menden aser mapa anguyonga, kadaser asen tsüraburtem Naga yimten nüchiso asoshi raradang arem nung aya marem süngolio aser ali mejaka senzüba mapatem amadoktsü ? Aji oda, tanü asenok India government nung menden tajung ka anguba mesüra takar-tulur akümba agi, Naga yimten nüchiso asoshi jajadang arem nung aser ayong nung taküm samabatem kodaser mezügmeshitsü ? Ibajibo Chief minister akümyonga amadokla masü aser IAS, IPS aser IFS ama government tenzükbba mapa nung jenjang tajung anguyonga amadoktsüba mapa ka masü ! Israel nungertem Babylon lima tepuokdak alidang, parnoki ayongküm nung oagi süngdong nung kongki itdaka yur, par tetsü taso lima aser yimten temeten bilemteta, " Oh Yirusalem, ni na amadokra, kü teka tachichi mapa meinyaktetsüsa kümdakjang aser ni na mebilemtetra, kü temeli kü tebang tsüngbangnem nung maloka yujang," ta atenba Tenüngsang Ken 137 asenoki tanüa ken küma atenba ama, asenok daka kasa pei tetsü taso lima yimten temeten mamadoki bilemtetba tangatetba shisatsü alitsüla. Aji oda, kasaji, asenokia, " Oh kü tasoli Naga lima, tanü nie India wako atsüketa tushiyongkala, ozü tsüraburtemi Naga yimten asoshi taküm bendanga agütsüba ni amadokra, India wako matsükettetsüsa kü teka ashirepdakjang aser India naklo kena metentetsüsa kü temeli marakzükteti kümdakjang," ta asen tasoli yimten temeten asoshi tsüraburtemi taküm tenla agütsübatem bilemteta teti asen mulungjang nung azüngashia saraademtsüla. Ashiko, tanü asenok Naga nungeri aikati Luroi 14 nü Naga kin wako atsüketa Naga yimten nüchiso amongba sentong aser mapatem ya atalaja alitsüa akok, kechiyong asenok India yimten kübok alir. Ajisüaka, tanü tashi August 14 anogo nung Naga yimten nüchiso anogomung amongba ya pelatepa amunger masü, ibai asenok asoshi tsürabur mapang Naga yimten nüchiso asoshi taküm tenla agütsüba, parnok reshikangshi timtem ajuruba anogotem bilemteta akhüm agütsüba anogo lir. Aji oda, Naga yimten tongpang nung nokdaka lia India sepaitemi puer reshikangshiba agi atsükalok kaor, tanü tashi timtemseta aliba tsüraburtem aiki asenok den taküm lir. Tanü asenoki Naga yimten nüchiso anguba anogo amongba yagi asenoki parnok dang nenoki 'Naga lima asoshi tenlaba tenlatem onoki mamaogo' ta nenshia metetdoksür. Iba jagi asenok dak pei tasoli meimba tanela aser shisatsü ano khen taküm küma jangrushidaksür. Alima kin shia nung senso ka dak iba tanela aser tangatetbaji alitsü nüngdaker. Atangji, tanü asenok India den lir aser asünga India den alitsüa akok saka asenoki asen tetsü tasoli yimten nüchiso otsü aser iba temeten mamadoki akhüm agüja bilemtetra, tangaria asenok ya nüchibo nüchia ta ashitsü aser nüchi purtemang nüchiso angutsü.

OLEMSABANG

AJEMALUA AREMZÜKBAJI TASÜ-TAIT HADIR KA LIR

~ L. Kika Pongener.

(Yashi adok nungi...)

Tsüngrem o-i ashir, "Shibai kangla ka tangar asoshi yanglur; pai yangluba kangla nungji pa asongtsü. Pa mapa tamajung pa dangi meyipa shilangtsü. Pa sentong tamajung pa tokolak nung atemtsü" (T.Ken-7:15-16). Atangji, Tsüngrem o-i ashiba ama....Haman-i Yihuda nungba Mordekai soseta sudaktsütsü tasa yangluba nung; meyiper pa-ang soseta asütsüsa tensa mapangi bentsür aru. Asenoki kechi kodakinarka sangra-sangjia asen madak lennir tajung; temba-tinur tajung; lokti nung külem tenzüker, mesura lokti nung tazünpur kar dak; tashiyim agi tim masüba mapa inyaka, maak sudakja, tiyazü agi tai tongloktsür attsüzüktsü aser atsüngdoktsü akok....Saka tia makara kenubo asena iba küsa jenjang jagi ayitsüsa tensa mapangi bentsür arutsü....!!! Asenok iba alima nung ya kar kenu, kar kenu ta melentepa lia aotsü. Ajiser, asenok shinga-ia asüngji kechi tensa ka ajurutsü'ar kecha meteta maka. Tsüngrem o-i ashir...."Asüng indang ne sasa mezümeküm tesu, kechiyong anogoi kechi bener arutsütsü nai memetet" (A.Shin-27:1). Aji oda, tanübo asenokji nutsüng-nubu aika alitsü akok; asenok ket nung rongsen aser tashi (Power) amma alitsü akok; asenokji tulur aser sentsü-aketer aika alitsü akok. Ajisuaka, nubensorji kenubo kijasor akümtsü; takarji kenubo sensaker akümtsü aser tashi (Power)-ji kenubo tangar kar keti aotsü akok. Aji oda, nutsüng-nubu, tashi-tawa, rongsen aser tashi (Power) dak nendaker tashiyim agi akoktsü merangba jagi; lokti ka kodanga meyanglushitettsü....Kechiyong tashiyim agi amokmerena akokbaji arishia nokdaka malitsü....Saka talangka moi laoadoktsü.

Asenok nisung'er tsütsü nungibo tashiyim agi meinyaktsüyim inyaka akokbaji takok tuluka ka angu amai bilemtsü akok; saka meinyaktsüyim mapa inyakbaji azüklen nungi Tsüngremi reprangdar....Aser Tsüngremi kenubo o bendangtsü. Tsüngrem o-i ashir...."Nisung tsüngdang shidak masukba lenmang ka lir; Saka iba tatempangji tasüba lenmang" (A.Shin-16:25). Aji oda, tanü aseni inyakbaji nisung tsüngdangbo temeden angutsü akok....Saka Tsüngrem tsüngdangpo temeden mangutsü. Shirnoki tanü takok asa-a tashiyim agi ashikülaka mapa tamajung inyaker....Parnoki inyakba taa-ji kenu meyipa angutsü. Tsüngrem o-i ashir, "Tamajunger linuk nungi leptoktsü; aser ashi-külaker tera nungi atsütoktsü" (A.Shin-2:22). Ashiko, nisung-ibo kecha meshitettsü akok....Saka Tsüngrem tsüngdang shinga mejenbutsü."Kibubai ashir, mangyangba kü meyong; ni shia agütsütsü" (Rom-12:19). Shirnoki tanü jenjang tera junga lir....ta ser asüküma aser ngasangadema tashiyim agi meinyaktsüyim mapa inyaker.... Repranga liang parnokji chirnur aser semchi-semnur tashi tansutsü-ka asütsü.

Otsüla oboula nungeri takzü-takponga aruba....Lennir tajungi pei jenjang ajungtsü atema pei lima raksatsü mebilemer....Saka lennir tamajungibo pei jenjang ajungtsü arishidang pei lima raksatsü mapayur. Lennir tajung-ibo pei jenjang mejungi liaka; pei lima raksatsü kanga apayutsü. Shirnok lennir tajung masü; parnok-ibo pei jenjang junnudang pei lima raksatsü mapayutsü. Ano tsürabur nungi teti ata-a atongoka arurtem-ibo; ajemalua tila kümer pei lima meima tenzüksü. Ajisuaka, tsürabur nungi kodanga ata-a matongokdang kar tazünpur menden nung ata-a atongokra aser jenjang tera junga kümra....Item lennir jagibo tangar tenuki mangu kanga ulua bilemtsü aser pei lima raksatsü mapayutsü. Atangji, ajemalua tila kümer aremzükbaji takok angutsü hadir tajungtiba ka asütsü...."Ajemalurtemi alima senmang amangtsü" (T.Ken-37:11).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tanü Buenos Aires nung 'March for Jesus' sentong agitsü



2017 küm Buenos Aires nung aliba Plaza de los Dos Congresos nung March for Jesus sentong nung tangokba noksa nung angur.

August 16, 2026: August 17, 2026 nü Argentina tesem balala nungi Khristantem Buenos Aires yimti nung adenshia 'March for Jesus' sentong nung shilem agitsü.

T a m a n g e r t e m i sarasademtsü aser Tsüngrem külemtsü.

"March for Jesus" sentong ya Hombar nikongdang 1:00 ako nung Avenida de Mayo nungi tenzüksü aser 2:200 ako tashi nung Plaza de los Dos Congresos atongba sülen yangji tongti sentong agitsü, ta sentong ayongzükertemi metetdaksü.

Argentina nung national holiday "Passing into Immortality of Gen. José de San Martıñ" anogomong nung March for Jesus sentong ya

agitsü.

Iba sentong nung osangtajung ken atentsü, Tsüngrem külemtsü aser Argentina aser ketdangsertem atema sarasademtsütsü. Iba sentong nung nüngtugu kentenertem aser yimsü balala amangertema adentsü.

Sentong ayongzükertemi ashiba agi, iba sentong ya yimjak nung evangelical telongjem sayuba sentong ka asütsü, iba denji külemi yimti lenmang nung tamang, tesünep aser teimla osang sangdongtsü atema maongka asütsü.

2024 küm November 18 nü Rosario nunga Khristantem aika Monumento Nacional a la Bandera (National Flag Memorial) nung adenshia sarasadem sentong agia liasü.

"March for Jesus" ya mezüng 1987 küm London nung agia liasü aser iba sentongji Youth With A Mission, Pioneer aser Ichthus Christian Fellowship-i senteper ayongzüka liasü.

Mezüngbuba March for Jesus sentong nung nisung 15,000 shi aden aser tangbo linük aika nung iba sentong ya ayongzüka agir.

2017 küm nunga Argentina nung iba ama sentong ka ayongzüka agi. Protestant Reformation küm 500 ajungba nüngtem nung iba sentongji agia liasü. 2017 küm November 25 nü Buenos Aires nung aliba Plaza de los Dos Congresos nung ayongzüka tongti sentong nungji nsiung 40,000 dak tali aden.

ANO GO ABEN TSÜNGREM DEN

Khristan Tekülem
Mathi 4:1-11

Yihuda nunger yimsü nung lenir tulu kati Yihuda nunger aser khristantem kasa tekülem nung tajangzük anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemtsür". Ibai bushitettsü tatempangba lemanji tekülembaji lir kechiaser tekülembaji taküm aliba leman ka lir. Tsüngrem tesangwa nung alimaji anguba leman ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzüka taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba tebilemtsü aneptsü asoshi nai kechi merangdanger? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Kü tanela nok nungi kümzükan, kü taküm azü tashi nungi kümzükan. Molusongzü bang nungi kümzükan; arem nashi pungchi nungi Nai kümzükan. Aser tesüneptsüba Tsüngremi nenok tetsüng kübok Satan ajemshitsü.

Khristan telok ana nem FCRA registration agütsütsü court-i tuyu

August 16, 2026: Union Home Ministry-i Arogoi ketdangsüba charity telok ana indang Foreign Contribution Regulation Act (FCRA) registration thinentsütsü telemtetba agia liasü, ajisüaka Kerala nung temaba court kati iba tetuyubaji agentsüogo.

2022 küm Kerala yimtiba, Thiruvananthapuram nung seaport project ka anema longkak aitba nung Khristan melungtet telok ana jagi senotsü agi yaria liasü, ta tai tonglokja melungtet telok ana registration thinentsütsü tuyua liasü.

Ajisüaka August 11, 2026 nü Kerala High Court-i tetuyuba ana agüja Union Home ministry dang ita asem tsüngda Kerala Social Service Forum aser Save A Family Plan na nem tanaben registration agüjang, ta tuyu.

Khristan melungtet telok ana jagi ozüng alema inyakba kulir mali, ajisüaka telok ana registration renew asütsü memelar, ta court-i metetdaksü.

Justice Bechu Kurian Thomas-i, Union Home Ministry-i Intelligence Bureau (IB) report kija nung ajemdaker registrations agentsütsü telemtetba agi, ta metetdaksü.

Kerala Social Service Forum ya Kerala nung aliba Catholic diocesan social service societies

32 den amalitepa inyakba telok ka lir.

IB report nungji iba Forum yagi Kerala Catholic Bishops' Council den amalitepa inyaker, ta metetdakja liasü.

State yimtiba, Thiruvananthapuram nung Adani Vizhinjam seaport anema longkak aitertemji Kerala Catholic Bishops' Council-i pusema liasü.

Ano külen IB report ajangasa, sensak tia ajema kümdaksütsü atema inyakba telok Save A Family Plan-i Trivandrum Social Service Society nem senotsü agütsü aser senotsüji longkak aitba nung amshia liasü, ta metetdaksü.

Ajisüaka High Court-i, longkak aitertem nem senotsü agütsü, ta asütsüsa ken o benokertemi kuli magütsütet, ta metetdaksü.

Kerala Social Service Forum aser Save A Family Plan nati, 1985 küm nungi parnok ket nung FCRA registration lir, aser tang tashi parnoki bendanglen nungi anguba senotsüji ozüng alema inyakba maparen nung mamshir, ta metetdaksü.

Parnokisa, 2022 küm tzüyimkümlen angopur Khristantemi seaport anema longkak aitba nungji parnoki

shilem agia mali, ta metetdaksü.

Telok ana jagibo, registration renewal magizükba atema sorkari kuli kecha memetetdaksü, ta metetdaksü.

Ajisüaka sorkaribo, FCRA kübok bendanglen nungi anguba senotsüji temeim mapa inyakba nung amshiba dak alaka linük anema inyakba nungbo mamshitsüla, ajisüaka Khristan charity telok ana jagi iba temzüng alema inyaka seaport anema longkak aitertem yaritsü atema senotsüji amshi, ta metetdaksü.

Kerala High court-isa sen million 167 ji amshitsü atema Save A Family Plan nem

temelaba agütsüogo. Sorkari FCRA registration thinentsüba ajanga parnoki senji mamshiteti liasü.

Ano külen tanga osang ka nung, Goa nunga Bombay High Court bench kati Arogoi ketdangsüba telok ana indang FCRA licenses khenpiga atema thinenja lir.

Court-isa Union home ministry dang Goa Diocesan Society of Education-i ken o agütsüba dak sendakba nung telangzüba agüjang, ta tuyuogo,

Tesüiba küm asem tsüngda bendanglen nungi senotsü kecha manguba agi taküm February ita nung telok ana indang FCRA licenses ji thinenja liasü.

Ajisüaka court-i, tesüiba küm asem tashi bendanglen nungi senotsü menguaka telok ana jagi loktiliba tajangzük ngudaksütsü atema peipei wadang maneni inyaker, ta metetdaksü.

Iba dak sendakba nung September 10 tashi nung telangzüba agüjang, ta Bombay High Court-i Union home ministry dang tuyuogo.

2014 küm Centre nung Narendra Modi leniba nung sorkar akümba sülen tang tashi nung FCRA registration 22,000 thinentsüogo.

Tang India nung registration tejangja aliba organization 14,434 dang lir.



Phom Baptist Christian Association (PBCA) Women Dept-i Pochury Baptist Church Council (PBCC) den senteper August 11-13 anogotem nung Meluri district kübok PBCC Mission Centre Yisisotha nung Leadership Training ayongzüka agiba sülen tangokba noksa nung angur. Iba sentong nung PBCC Women Dept aser Christian Education Department nungi nisung 113 aden. Iba training nung shisalen sayurtemji PBCA nungi P Angbhen Phom, Rev. Mongvai aser Chulei Phom nunger liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngshi

(v) tangari nisung dak temulunglemteta jembiba (acknowledge by others)

* Teloki Moaba mapa ajak nung züngshia amshi.

Züngshimetet

(adj) azüng aser zülutsü metetba (literacy)

* Nagaland nungbo nisung ajak züngshimetetertem dang lir.

OLONG PAITEP # 7601

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7600 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioksü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER

Visakhapatnam nung Mahila Manovikasam ta ser women's empowerment maparen ka Guinness World Records nung zülüokogo. Madhavi Suribhatla-i tetsür 330 anir national flags 47,617 tashi knitting & displaying asüba atema iba otsü tasen yanglu.

Indian national flags ya plastic melena wool agi yanglu aser August 7, 2026 nü Visakhapatnam nung 12.18 kilometre nung sayua liasü.

Madhavi-i 'Mahila Manovikasam' ta ser online group ka lapoka lir aser iba ajanga lai tetsürtem dang handicraft sayur.

Assam sorkari 'long-term flood rehabilitation' sentong renemer

Guwahati, August 16, 2026

(Agencies): Assam state sorkari tzümetsüng agi kongshia alirtem asoshi rehabilitation programme ka renemdar aser iba nung raksaba yanglushitsü aser state-i tarutsü nung tzümetsüng tensa tizüktetsü asoshi temulung agütsür ta Chief Minister Himanta Biswa Sarma-i ashi.

Guwahati nung 80 buba

Independence Day sentong nung jembidang sorkari short-term relief nungi rehabilitation, reconstruction & measures melener ta CM Sarma-i ashi.

Tzümetsüng ajanga teraksa bentsür aruba asoshi digital assessment südar aser takoksa ajuruba kibongtemi teyari angutsüsa mapa inyakdar ta paisa ashi.

Iba rehabilitation package

kübok kibongtemi ki raksaba yanglushitsü, osettsüset raksaba melentsü, kiset shirurudem, tube wells, looms & textiles amala akoksa atema senotsü teyari agütsütsü.

Sorkarisa tzümetsüng agi kongshirtem nem loan repayment moratorium ka tenzüksü aser iba ajanga parnok senotsü khuret ajema akümtsü ta CM Sarma-isa ashi.

Lakhimpur district nung school timings melenshir

Guwahati, August 16, 2026

(Agencies): Assam kübok Lakhimpur district nung school tem mapang melenshir aser iba ya kanga tatsük mapang kaketshirtemi kümzüka ayutsü mechi tenzüker.

Lower primary nungi senior higher secondary level school ajak anepdang 7:00 ako nungi class tenzüksü ta district

education ketdangpurtemi ashi.

Class telemsa nung ajemdaker closing times balala asütsü ta Lakhimpur District Circle Inspector of Schools and District Primary Education Officer Bedabrata Gogoi-i ashi.

Lower primary kaketshirtem anepdang 11:00 ako nung senshidaktsütsü aser upper

primary kaketshirtem anepdang 11:30 ako nung senshishitsü. Maneni, high schools, higher secondary aser senior higher secondary classes anüpdang 12:00 ako tashi agitsü ta tetuyuba nung shia lir.

Iba tetuyuba kübok Lakhimpur District nung government, provincialised aser private schools ajak adener.

Lumding-Badarpur Hill Section nung train services metetdaksür

Maligaon, August 16, 2026

(Agencies): New Harangajao station anasa railway tracks (Line-1 and Line-2) alaba sülen maparen teinyakdak asüba agi Lumding-Badarpur Hill Section nung train senzüba temelenshi kar süogo ta Northeast Frontier Railway (NFR)-i metetdaksüogo.

Lumding-Badarpur Hill Section nung Line-3 ajanga dang train senzür aser iba asoshi tsünglanglen agüja aliba train services nung temelenshi kar asüba NFR-i metetdaksü.

Cancellation of Trains:

Train No. 15617 (Guwahati - Dullabcherra) Express - 17.08.2026 nungi apusotsü aliba athir.

Train No. 15618 (Dullabcherra - Guwahati) Express - 18.08.2026 nungi apusotsü aliba athir.

Train No. 15615 (Guwahati - Silchar) Express - 17.08.2026 nungi apusotsü aliba athir.

Train No. 15616 (Silchar - Guwahati) Express - 18.08.2026 nungi apusotsü aliba athir.

Rescheduling of Trains:

Train No. 15650 (Narangi - Agartala) Express - 17.08.2026 nungi apusotsü aliba Narangi



nungi 22:30 hrs nung apuotsü.

Train No. 15649 (Agartala - Narangi) Express - 17.08.2026 nungi apusotsü aliba Agartala nungi 23:30 hrs nung apusotsü.

Train No. 15609 (Guwahati - Sairang) Express - 17.08.2026 nungi apusotsü aliba Guwahati nungi 23:30 hrs nung apusotsü.

Train No. 15610 (Sairang - Guwahati) Express - 17.08.2026 nungi apusotsü aliba Sairang nungi 21:30 hrs nung apusotsü.

Train No. 15611 (Rangiya - Silchar) Express - 17.08.2026 nungi apusotsü aliba Rangiya nungi 23:30 hrs nung apusotsü.

Train No. 15612 (Silchar - Rangiya) Express - 17.08.2026 nungi apusotsü aliba 18.08.2026

nü Silchar nungi 05:00 hrs nung apusotsü.

Train No. 20501 (Agartala - Anand Vihar Terminal) Tejas Express - 17.08.2026 nungi apusotsü aliba Agartala nungi 23:00 hrs nung apusotsü.

Train No. 14037 (Silchar - New Delhi) Poorvottar Sampark Kranti Express - 17.08.2026 nung apusotsü aliba 18.08.2026 nü Silchar nungi 04:10 hrs nung apusotsü.

Regulation of Trains:

Train No. 15645 (Charlapalli - Silchar) Express - 15.08.2026 nü mapang tapet nung apusotsü.

Train No. 12501 (Kolkata - Agartala) Express - 16.08.2026 nü mapang tapet nung apusotsü.

Brazil Tir Lula-i tatembang election nübuyim tenzükogo



Sao Paulo, Luroi/August 16 (Agencies): Brazilian Tir Luiz Inácio Lula da Silva-i pa asoshi tatembangba election nübuyim Deobarnü stadium ka nungi tenzükogo, kong pa langpang ka nung nokdaker 1979 nung yin mapa inyaker longkak aita aliba nisung 60,000 shi den sound system medeni jembia liasü.

Sao Paulo yimti tezülen mapang ka factory agi sünga aliba Sao Bernardo do Campo nung "May 1" stadium nung iba nübuyim tenzükba ya labor movement nem akhum agütsüba alitsü, kechiaser iba movement ya ajanga Lula ya factory nung mapa inyaka aliba nungi Brazil nung mezüngbuba "working-class" tir akum.

Küm 50 jungnüa arur tang Lula-i digital app nung amendaker mapa inyaker den nübuyimtsü tim atemer, kong mapang ka par Workers Party (PT) indang tongtired ama kumtetba unions aser factory floors den tesendaktep kangabo mali.

"Mapa inyakba tsütsü temelenshi kanga lir," ta Lula-i 2024 küm yimti tulutem nung elections agiba nung par sorkari tamakok ajuruba sülen shia liasü.

"Formal, registered employment kisüng masü saka yimya balala nung mapa inyaker ajungai agizüktettsüsa asenoki inyaksü nüngdaker," ta pai ashi.

October ita vote agütsütsü lia PT-i yamaji inyaksü meranga hopta nung mapang tatsüba mapa inyaksü bhukuma nokdaker aser regulations covering pay, working conditions, social security benefits aser platform algorithms densema app nung ajemdaker mapa inyaktertem kumzüka ayutsü atema sentong tasen benoktsü meranger.

Company temi ibaji anema nokdakba tangbo timba lulaa ogo, aser lanurtem timba sür app amshia mapa inyaker tebur million aika sorkar sentong nung teimla makateti lir, aser yangji Lula den tokteper right-wing nungi Senator Flavio Bolsonaro nokdaksü renema lir.

Kasa mapang Brazil indang formal employment system tema nung mapa jenti akumba ya tebilemstü ka lir, kong mapa inyaker nem labour rights aser social-security teyari aika agütsür.

2010 küm tatemlen formal jobs shilem 46.7 aliba nungi December ita shilem 38.2 akum, aser unemployment shilem 5.1 nung 2025 küm tembang.

2024 küm Lula-i app amshiba mapa azüoktsü merang, saka tech company tulu temi memulungba ajanga iba mera magitet aser mapa inyaker temi temulung malemba tali akum. Taküma par sorkari meranger, saka bill tasenba ya

Congress nung tsükdaka lir.

Iba timtem ya ajanga labor nung tera yanga aliba party kati mapa inyaker den tali pila aoba sayur.

Brazil indang unionization rate ya tesüiba küm ter tsüngta tesadang kumogo, koba 2014 küm shilem 15.7 aliba nungi 2024 küm shilem 8.9 kuma lir, ta ketdangsür temi tang tesüsa data agütsüba nung ashir.

Getulio Vargas Foundation nung political science professor Marco Teixeira-i ashiba agi, Workers Party dak app amshia mapa inyaker nem sangdoktsütsü osang tejangja mali.

Party tir Edinho Silva-i unions aser left-wing telok temi informal workers aser parnok mapa inyakba tensa tali tajungba angatettsü nüngdaker, ta ashi.

"Parnoki parnok den mejembir, parnoki parnok manidener, aser parnok anogoshi libaliru nung mali."

2025 küm PT ajanga commission asüba survey ka nung informal workers shilem 65-i entrepreneurs kumner aser shilem 27.5-i dang formal job aginüba ngutet. Ajisüaka shilem 56-i sick pay, injury benefits aser minimum wage ya kanga tongtipang lir ta ashir.

Shilem 40 jungnüa-i pei meyong union alinung ajangzüksü ta ashir aser shilem kasai union kata nunga madentsü ta ashir.

Hungary anüdoklen bus ka tsükok, nisung 12 asü

Mezokeresztes, Luroi/August 16 (Agencies): Poland nung register süa aliba bus ka nung tourists tem bener Hungary anüdoklen makepoka nisung 12 asü aser 10 yiru, ta ketdangsür temi ashir.

Iba lendong ya Nyiregyhaza tsütsüi aodang Mezokeresztes jila anasa M3 motorway nung atalok, ta Hungarian police ajanga ashi.

Osang ajanga ashiba agi, bus ya lenmang temotong ka nung len tezüleni oa tzüchi nung tsüka makepok. Gari anisang ya amoa oa liasü südi, ta police-i ashir.

Bus nungya passenger 57 den driver ana mena liasü, ta Hungarian state news agency MTI ajanga ashir. Iba lendong

atalokba tesem nung tangokba noksatem nung bus sentsü temerem ka kanga mejungi raksar tzüchi nung laoka liasü aser windows jaksar aser khu bena aliba tesem balala nung prokshia liasü.

Yirur aliba passenger tem temang anepalutsü atema mozüki balalai anir ogo. Driver ya police ket nung lir aser maneni bushisüngdangba mapang lir, ta police-i ashi.

Asürtem ya Polish-registered bus nung mena alirtem lir. Iba lendong nung nisung 12 asü aser 10 yiru.

Iba lendong atalokba sülen Poland Tir Karol Nawrocki-i asükhü lemsatepogo.

"Hungary nung Polish bus

lendong atalokba osang angashia mang ayimer, kong asen nübur aika süogo," ta pai X nung post asü.

Polish Foreign Minister Radoslaw Sikorski-ia ibai lendong tamajung lir ta ashi aser Polish consular ketdangsür temi Hungarian ketdangsürtem den osang agiteper aser tensa nung yariteptar ta ashi.

Hungarian police temi ashiba agi, driver kanga anibelemer aliba ajanga iba lendong ya atalok südi ta tang tashinung bushiteta lir aser gari anisang amoa oa liasü südi ta temulung melemi bilemer.

Ketdangsür temi iba lendong nung asürtem aser yirur alirtem jangjatsü merangba mapang lir.

Russia meyong ta temulung melemi bilemba drone ka Romania nung khadang

Bucharest, Luroi/August 16 (Agencies): NATO indang F-18 fighter kati ozüng alema Romanian national airspace-i aitba drone ka khadangogo. Taküm tang agi drone pezübuba khadangogo, ta Romania indang defence ministry-i Deobarnü ashi.

NATO indang military headquarters atema otongdar U.S. Army Colonel Martin O'Donnell-i ashiba agi, parnoki ken o kanga junga asadanga atadar aser amokmeren balala nokdangtsü atema renema lir.

"Deobarnü tatalokba dak sendakba nung tang bushisüngdang südar, saka drone ya Russia indang asütsü ta bilemer," ta pai ashi.

NATO züngsem Romania aser Ukraine na arrtsü km 614 talang lir, aser parnoki taoba küm pezü tsüngda Russia indang drone tem linük anüng ajanga süiba osang agüja aruogo. Iba den Black Sea nung shishilemba dang amshiba tongtiband tzü lenmangtem nunga mine tem apongdaka aliba indang

metetdaksüogo.

Romania indang defence ministry-i iba drone ya kong nungi aru iba indang osang tejangja magütsü, saka drone ya kidanger Moldova nungi aitba mapang radar agi lazüka liasü, ta metetdaksü.

Romania-i yoka aliba Spanish NATO contingent nung densema aliba F-18 jet indang radar-i iba drone putet aser khazüka yoktsü atema temelaba anguba sülen khazüka yoka liasü, ta ministry-i ashiba den, drone ya 5:01 a.m nung khazüka yoka liasü, ta shisem.

Ministry-isa, drone teraksa ya yimtsüng ana tsüngda nisung maliba tesem ka nung tsükogo, ta ashi.

July ita Romania F-16 fighter jet pilot temi linük anüng ajanga aitba Russia nunger indang drone asem khazüka yoka liasü.

May ita Ukraine amakba mapang Russia indang drone ka Galati nung nisung aliba apartment block ka nung chiokba sülen nisung ana yirua liasü.

Indonesia menonok lendong nung asür 51 jungogo



Sikka, Luroi/August 16 (Agencies): 7.7 magnitude menonok ka agi Indonesia anütoklen anokshitsüba sülen lendong nung asür 51 jungogo, aser nisung 5000 shi aninogo. Menonok anokba sülen anentsüh alua lenmangtem nokdangogo, ta ketdangsürtemi Deobarnü metetdaksü.

Honibar anepdang menonok agi East Nusa Tenggara province kongshiba sülen nisung 36 kanga mejungi yirurogo aser nisung 77 terara yirur lir, ta Deputy Health Minister Benjamin Paulus Octavianus-i ashi.

Menonok anokba sülen ano aftershock 342 shi ajangshiogo. 2022 küm West Java nung menonok tesashi ka anoka nisung noklang aika tepsetba sülen Indonesia nung tang menonok tesashiba anokogo.

Sikka tesem nung nisung 3,300 dak tema peisasa tanga tesem bushiogo aser parnok aika sports arena tem nung jenoka lir, ta disaster mitigation agency BNPB-i ashi.

Sikka nung alir kar parnok ki chireper aliba kima süki yanglur jenoka lir, aser Maumere jila nung mokzüki ka kima süki ka nung nüburtem

temang anepaludar.

"Ni kü temang dang bener aru," ta arishi küm 63 tain Abdul Mutas-i Reuters dang ashi. Par kibong ya Sikka jila nung süki ka nung mejanga liasü. "Tzüsemluluba kuma aoba ajanga onok ajentsüsa aküm," ta paisa shisem.

"Sikka nung alirtem timba ki telung nung masü saka kima sükitem nung mejangogo," ta Sikka indang deputy regent Simon Subandi-i ashi.

Iba tesemi military aser police officer 3,500 dak tema yokogo, ta Cabinet Secretary Teddy Indra Wijaya-i ashi.

Teküzmükertem anentsüh agi nokdakdang aliba Maumere tesem tongaogo, ta Indonesia indang search and rescue agency-i ashi. Tang tashi nung nisung kwi samar ali aji mejangja, saka parnok timba ki chereper aliba nung sabanga lir aser ki 1,300 dak tema raksaogo, ta BNPB-i ashi.

Kasa mapang nung power maliba ajanga petrol station metsü inyaksangshi mesüteti lir, ta state energy firm Pertamina-i ashi.

Iba tesem ya 1992 kuma 7.5 magnitude menonok ka agi anokshija teraksatsüba tulu adokdakja liasü.

Cincinnati Masters: Djokovic-i mezüngbuba asaya mekoki tsükogo



Luroi/August 16, 2026 (Agencies): ATP-WTA Cincinnati Masters nung Honibarnü mimlai lia Novak Djokovic-i mezüngbuba asaya mekoki tsükogo.

Pa Argentina nunger asayar Thiago Tirante 2-6, 6-4, 6-4 agi tsükdaksüogo. Iba ya pa asoshi ATP-WTA Cincinnati Masters nung tatembangbuba asaya asütsü akok.

Tena tsüingda asaya ya ghonda ana ser tesadang asaya, koba arishi küm 39 tain Djokovic asoshi Wimbledon semi-finals nung Jannik Sinner makokba sülen mezüngbuba asaya liasü.

Djokovic, shibai Cincinnati

nung 2023 küm tatemsa takok ngua liasü, pai mezüngbuba set bo ayong ayonga akok.

Tanabuba set tasembuba game minute 18 tashi asayaba sülen pai akok. Iba game nung pai break point pezü tashi kümzüka asaya saka pa kanga belematokba reprangtetogo.

Iba game sülen Djokovic-i medical timeout ka agi aser physio aser doctor ka arua pa temang anepalua liasü.

Tirante-i tanabuba set akokba sülen asayar anaprongla locker room nung ia mapang tatsüka tatsük nungi anisüngzüka liasü.

Tatsüka anisüngzüka sülen

Djokovic-i deciding set ya kanga junga asaya tenzük, saka game tekububa nung Djokovic-i break points asem kümzük saka drop shot tai ka asayaba sülen Tirante nem serve break südaksü. Tirante asoshi Djokovic akokba ya pa indang career nung tang tashi nung takok tulutiba lir.

Serbia nunger asayar shiba August 30 nü nungi tenzüka US Open asayatsü lir, pai pa Cincinnati nung taküm tatembangbuba asayar asütsü akok ta shiogo.

Kasa asayamung nung French Open runner-up Flavio Cobolli-i Miomir Kecmanovic 6-1, 4-6, 6-3 agi akok, aser Martin Landaluce-i Matteo Arnaldi 6-4, 4-6, 6-4 agi kokogo.

WTA draw nung Philippines tsür Alexandra Eala-i 6-1, 3-0 agi Elena-Gabriela Ruse kokogo, shiba yirua liasü. Eala taruba asaya Amanda Anisimova den asayatsü, shibai ninth seed Zeynep Sonmez 6-2, 6-3 agi kokogo.

Chwalinska-i 6-2, 6-2 agi Cristina Bucsa akok aser Kalinskaya-i Caty McNally 6-3, 6-4 agi kokogo. Magdalena-i 6-1, 6-3 agi Jelena Ostapenko kokogo.

Douglass-i anogo ka nung 50m freestyle world record anaben yanglu



Luroi/August 16, 2026 (Agencies): Irvine, California nung Pan Pacific Swimming Championships nung America tsür Kate Douglass-i anogo ka nung 50m freestyle world record anaben tashi yangluogo.

Olympic nung medal ana ngur alila yagi final asaya nung alizüing 23.19 seconds nung tongteta lai ghonda ishika tejakdang heats nung alizüing 23.49 seconds nung tongteta world record yanglur aliba yanglushia liasü.

Arishi küm 24 tain Douglass-i tang agi tasembububa world record yangluogo. Lai June ita 23.59 seconds nung alizüing tongteta world record ka yanglu, saka anogo teku dang lir külem America tsür Gretchen Walsh-i (23.55) record yanglushia liasü.

Iba asaya nunga Walsh

(23.74) tanabuba jenjang nung tembang aser Australia tsür Meg Harris tasembububa nung liasü.

Kasa mapang nung Paris nung European Aquatics Championships nung Germany nunger tzüwar Johannes Liebmann-i, tebur 1500m freestyle nung second pezü shi agi tang world record yanglur aliba dang nungi takaraba alizüing tongteta record yanglushio.

Arishi küm 19 tain asayar yagi 14 minutes 26.79 seconds nung alizüing tongtet, koba 2024 küm Olympics nung America nunger Bobby Finke-i yanglur aliba record dang nungi second 3.88 agi takaraba liasü.

1500m freestyle nung Liebmann ya 14:30 tsüingda alizüing tongtetba mezüngbuba asayar kümogo.

Djed Spence Serie A club Inter Milan nung denogo



Luroi/August 16, 2026 (Agencies): England nunger international asayar Djed Spence-i Tottenham Hotspur toktsür Inter Milan nung denogo, ta Inter-i Honibarnü sangdong ka ajanga metetdaksü.

Specialist website Transfermarkt-i ashiba agi, arishi küm 26 tain right-back asayar atema ya Inter-i euro million 30 agütsüogo.

"2000 küm asoba England nunger full-back ya Tottenham nungi Nerazzurri nung teti atema denogo. Spence-i 2031 küm June 30 nü tashi asayatsü atema tenangzüktepba

yangluogo," ta Inter sangdong ajanga metetdaksü.

Tottenham-ia, Spence-i club toktsüba indang parnok indang website ajanga metetdaksüogo.

"2022 küm July ita Middlesbrough nungi arua adenba sülen defender yagi onok atema 85 ben asayaogo aser iba mapang goal ana idaktsüogo. Pa tarutsü takok nung aotsü imlaja atar," ta club sangdong ajangsa metetdaksü.

Spurs puri pa euro million 14 agi alizük, aser taoba season club-i junga masayatetba mapang pa ya defender tem rongnung tanungtiba ka liasü.

Kasa mapang nung taküm World Cup nunga Spence ya England team nung tongtibang asayar ka liasü.

Pa Serie A nung tajangshiba terabo lir, kechiyong pa 2024 küm January nungi June tsüingda loan nung oa Genoa nungi ita trok asaya liasü.

Hopta ana tsüingda pa ya Inter nung adenba England nunger asayar tanabuba kümogo. July ita tatemi arishi küm 32 tain John Stones-i season 10 sülen Manchester City tokja iba Lombardy club nung denogo.

Tena ya Inter defence nung Italy nunger asayar Alessandro Bastoni aser Federico Dimarco na den asayatsü imlar.

Kasa mapang nung Paris Saint-Germain-i Belgium nunger left winger Mika Godts Ajax nungi alizükogo. Pa den küm pongu atema tenangzüktepba yangluogo.

Arishi küm 21 tain asayar ya taoba season ajaki jangja aküm. Pai Dutch league nung goal 17 idaktsü aser assist 12 sütsü aser pa nem young player of the year naroküm agüja liasü.

Ajax-i ashiba agi, bonus balala densema transfer taah euro million 55 liasü.

Godts ya Belgium team nungi anaben asayar lir, saka pa taküm World Cup squad nungbo meshim.

WTC points table Bangladesh jenjang junga kümogo

Luroi/August 16, 2026 (Agencies): Bangladesh-i parnok Test asaya puti otsü nung takok tajungtiba nguteta Darwin nung Australia wicket teku agi akokba sülen ICC World Test Championship 2025-27 nung parnok jenjang junga kümogo.

Tang asaya aliba cycle nung tanabenbuba tamakok nguaka WTC table nung Australia maneni temaba jenjang nung lir. Ajisüaka parnok indang points percentage (PCT) 87.50% aliba 77.78% kümogo aser tanga team temia meneptetsüsa kümogo.

Kasa mapang nung Bangladesh team jenjang pezübuba nung parnok jenjang akangshiogo. Parnok indang PCT 58.33% aliba 66.67% kümogo aser WTC Final atema toktepertem rongnung ka kümogo.

Australia-i Test asaya teku nung tenet akokba den ana makokba sülen tang point 84 ngua lir. Australia sülen South Africa tanabuba jenjang nung lir. Test pezü asayaba sülen parnok

indang PTC 75% lir. Table nung Zealand tasembububa jenjang nung lir. Asaya trok asayaba sülen parnoki 72.22% ngua lir. Pezübuba nung aliba Bangladesh team-i tang asaya aliba cycle nung asaya asem kokogo, ka draw asü aser ka mekoki lir.

Bangladesh-i Darwin nung takok anguba ya otsüsütsü ka lir, kechiyong parnoki tang mezüngbuba Australian nung Test ka kokogo.

Asaya nung Bangladesh nunger batter aser bowler tem ajaki kanga junga asayaogo. Tanzid Hasan-i century ka yanglua Bangladesh team jenjang junga küm daksü aser Hasan Mahmud aser Mehidy Hasan Miraz natia ball kanga junga ona tongtibang shilem agia liasü.

WTC rankings nung Test teku asayaba sülen India team-i point 52 ngua tang pongububa nung lir. Parnoki asaya pezü akokba den ka draw asü aser pezü mekoki lir. India team PCT 48.15%. lir. India sülen Sri Lanka (41.67%) trokbuba nung lir.

BILEMDANGANG

"Kati ka taoba ta züngshitepba ajanga telongjem adoker."